

## KOPI MO FAASAOSAOGA TALAFEAGAI A SUI USUFONO

### *ASO FARAILE, 23 MATI 2018*

*Na nofoia le Nofoa e le Fofoga Fetalai i le itula e 9:00 i le taeao.*

Tatalo.

**FOFOGA FETALAI:** Ou te faasilasila atu ua toe amatalia nei Tualumaga a le Fono Aoao Faitulafono.

### **TULAFONO TAU FAAOFI O TEUTEUGA O LE TULAFONO O LE FAASOLOGA O TIUTE 2018 – faitauga muamua**

**Afioga Hon TIALAVEA FEA LENIU TIONISIO HUNT (Minisita mo Tupe Maua):** Faafetai i lau Afioga i le Fofoga Fetalai mo le avanoa. Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faasologa o Tiute 2018 i lona faitauga muamua.*

*Faaluaina e le Minisita mo Aoga, Taaloga ma Aganuu ma le Minisita mo Tina ma Tamaitai, Atinae o Nuu, Afioga ma Agafesootai.*

*Na faamaonia le lafo ma faitauina le Tulafono Tau Faaofi i lona faitauga muamua.*

### **TULAFONO TAU FAAOFI O TEUTEUGA O LE TULAFONO O LE FAASOLOGA O TIUTE 2018 – faitauga faalua**

**FOFOGA FETALAI:** Talu ai ua taulimaina le Tusi Faamaonia o le Tulaga Faanatinati, o lea o le a sagai atu ai loa le Fono Aoao mo le faitauga faalua. Tulai mai lau Afioga i le Minisita mo Tupe Maua.

**Afioga Hon TIALAVEA FEA LENIU TIONISIO HUNT:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faasologa o Tiute 2018 i lona faitauga faalua, ma ou te fia tautala faamalamalama i ai.*

*Faaluaina e le Minisita mo Aoga, Taaloga ma Aganuu, Minisita o Tupe ma le Minisita mo Tina ma Tamaitai, Atinae o Nuu, Afioga ma Agafesootai.*

**FOFOGA FETALAI:** Ma o le avanoa foi lenei ou te tapa ma le faaloalo lau Afioga i le Minisita mo lau saunoaga faamalamalama.

**Afioga Hon TIALAVEA FEA LENIU TIONISIO HUNT:** Lau Afioga i le Fofoga Fetalai, ou te talitonu o le Tulafono Tau Faaofi lenei ua tele se malamalama i ai o le Maota ona o le faamalamalama a le Afioga i le Palemia i le mafuaaga na fai ai le Tulafono Tau Faaofi lenei. E tasi lava le auga o le Tulafono Tau Faaofi ina ia taumafai ai le tatou atunuu e toe agai i taumafa o lo o mafai ona maua i totonu o le tatou atunuu. O le Tulafono Tau Faaofi lenei e tolu ia vaega ia ua sii ia lafoga, ona o le naunautaiga lava e pei ona saunoa le Afioga i le Palemia i le aso ananafi. O le mamoe ua 20% le tiute, o lona lua o le pusamoa ua 10% le tiute lena ua tuu i ai, ma le siusiupipi e 20% le tiute ma le excise tax e 10%, lena ua faaopoopo i le tau o le siusiupipi i lenei vaitau ona o le taumafai lava e puipuia mai le atunuu i faamai ia e maua ai le gasegase i meaai lololo nei, aua pei ona fai atu se faamatalaga, ua tele ina uma ona faamalamalama e le Afioga i le Palemia ananafi, ia ae a i ai ni fesili ona ou taumafai lea e tali atu lau Afioga.

**FOFOGA FETALAI:** Malo faafetai. Ma o le avanoa foi lenei mo sui usufono.

Ia se i tuu atu muamua le avanoa i le Taitai o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegai (Palemia):** Lau Afioga i le Fofoga Fetalai, ou te faatalofa atu i lenei taeao fou i le afio o lau Afioga faapea foi le maleifua mai o le mamalu o le Maota, ae a le tapuai mai a lo tatou atunuu i ona tulaga faalupe, faapea foi le tapuaiga leleoa a Lana Afioga Mamalu, O Le Ao o le Malo ma Sui o le Fono a Sui Tofia, le faanonogamanu a le itupa o Faafeagaiga Taulagi ina ia foai mai e le Atua le tofamamao i le lauililiuina o mataupu i le tatou Maota nei o le Fonousu a Samoa.

Ae pau lava si mea lea ou te fia talanoa i ai e faaopoopo atu i le felafolafoaiga i le aso ananafi. O se faaiuga e le faigofie faaiuga faapenei, ona e fai o le manatu i le tulaga o le lafo pea le faaiuga e fai saoloto e le tagata. A o le mea lea e tupu, ua matua maoae lava faamai nei ua aafia ai i tatou. O faamai aupito maoae lea ua agai tele i luga o le faamai lea o le afaina o fatugao o tagata. Pe a manatua e le Maota lenei, e i ai le taimi na faatu ai le tatou falemai lenei ua silia i le lua taumafaiga na taumafai i ai ia isi Minisita na muamua atu ia Mulitalo, o le faamatalaga na aumai i le falemai foi faapea o lo o faia i Amerika Samoa e siliga ma le \$40milion tala Amerika, a \$40milion o lona uiga, e \$100milion tala Samoa i le tausaga e service ai le galuega lea. Ona taofi lea e le Malo ua taugata tele, ona toe lagaia foi lea mulimuli ane ai, e toe lalaga pe mafai lava ona maua se faamamaavega, ona tapa ai lea o se kamupani o lo o latou faatinoina le tulaga lea o le togafitiga o gasegase o le fatugao, e manatua foi o le fatugao o lana galuega o le faamamaina lea o le toto, e taamilo le toto i le tino atoa ona toe foi mai lea i i faamama, ma a faaletonu loa, ua faitau aso ia le tagata i lenei soifuaga. E lilifa lava la tatou manatu i isi gasegase, ae galo ai i le mea lea le tulaga ua oo i ai tatou ua toatele. O le ala lena o lea sa fai ai le faaiuga i le feutagaina ma le Malo o Niu Sila, afai e avatu a tatou gasegae i Niu Sila, ona malie lea o le Malo o Niu Sila e tuu loa i ai le avanoa e nonofo tumau ai.

Lau Afioga i le Fofoga Fetalai, e i ai le Minisita o le Kapeneta na aafia ai i i, ma o le taimi lava na ave ai i Niu Sila ina ia togafitia ai ina ia ola, e le i toe foi mai i Samoa na nofomau lava i Niu Sila, a o le Minisita o le Kapeneta ua le

mafa'i ona toe sau. O tagata la e o i Niu Sila e togafiti ai i i le mea lea, e faamavae lelei lava ma aiga e le toe mafai ona toe foi mai i Samoa, ave foi i ai e Niu Sila i luga o talosaga a Samoa le avanoa e mafai ai ona nofomau. O le tulaga la lenei o lea sa taumafai ai loa le Malo, po o le taugata, ia faatu pea se falemai iinei. E aumai le ofo foi a le kamupani lea e aumai e fai mai Ausetalia, e \$40miliona foi i le tausaga e faatino ai Ausetalia. O lona uiga, e lalata foi i le \$100miliona tala ona o le togafitiga o lenei gasegase, e le taugofie. O le ala lenei o lea na ave ai a tatou gasegase i Niu Sila e togafitia ai pea. E oo la i le taimi o lea ou te tau manatua pe toatolu ea pe toafa o tatou tagata ia na i ai pea i Niu Sila, ae ova ma le \$4miliona tala Niu Sila le tupe o lea sa totogi e Samoa i tagata ia toaititi na i ai. Ona fai loa lea o le faaiuga, a o le faaiuga, e maoae foi lenei gaoioiga na fai sa fai e Mulitalo. Na faatalanoa ai lea e Mulitalo ma le Minisita se tasi o fonotaga a Minisita o le Soifua Maloloina ma le Minisita o le Soifua Maloloina o le Malo lea o Singapore o lo o malosi tele le latou falemai la lea o fatugao. Ou te le iloa po o le a le auala sa i ai faatasi ma le Susuga Dr. Benjamin lea ua faasuafa ia Papalii e Malietoa, sa i ai la faatasi ma Benjamin le alii foma'i lea e na te faafoeina a tatou gasegase, e le i umi lava o le lipoti mai ia te au, na ona amata lava ona faatalanoa e Mulitalo tutulu loa ma Mulitalo i luma o le Minisita, ona tutu tutu lea, ia tago loa Mulitalo i le pito o lona ofu se'i ae solo ai ona loimata, ae aliali atu i o le pea a Mulitalo, o lea la ua te'i le Minisita. Na vave faamuta ai i ina le talanoaga valaau loa le Minisita, fai le mea lea e fai mai ai le Minisita o Samoa, ona omai lea i fafo ae valaau le Minisita lenei i le CEO, aua ne i outou toe aumaia se tagata faapea i ou luma. A o le mea e sili ai, ua ioe le Minisita o Sigapoa o le a fesoasoani mai ia Samoa, o lea na mafai ai ona tatou faia le falemai lea i se tau maualalo tele, ma amata ai loa ona toe faafoi mai tagata Samoa mai Niu Sila o latou ia, ua toe faafoi mai o le a togafiti i Samoa nei. E umi ni nai masina o tatou faaaogaina le foma'i mai fafo, ae na iu ina take over loa e a tatou foma'i ma a tatou nurses, o le legacy lenei a Mulitalo, e le mafai ona galo ai Mulitalo. Ua siliga i isi Minisita sa taumafai i ai muamua, ae pau lenei o le Minisita o le Soifua Maloloina na na mafaia le mea faigata lea, o le aumai o le falemai lenei e taugata tele faatu i Samoa. O le a la le mea lea ua i ai nei? Ua ova ma le selau ia latou o lea e togafiti, ma ua i ai foi le masini faapea mo Savaii. E le taugofie ma o le upu mai i le Kapeneta, o lo o tupu pea le mea lea talu ai taumafa ma mea ia e tatou te taumafaina.

Lau Afioga i le Fofoga Fetala'i o le faigata ia o mea faapenei pe a aumai i le Kapeneta, e fai o le taumafai e tilotilo i taumafa a le atunuu, ae tilotilo foi e le mafai ona alofia le tilotilo i le tulaga o gasegase ia ua gasegase ai lo tatou atunuu, aemaise o le vaai atu ua gasegase lea e le gata o le fatugao, ae ua gasegase lea i le suka, ia ona vaai atu lea ua fealuai, ua fealuai i nofoa faatavalevale ua faamuta ua tatipi o latou vae, se i tulou le paia o le Maota nei. O tulaga ia e le faigofie ai iuga faapenei. Ae o lo o manatua pea e le Minisita e ana le Tulafono ona ia aumaia i totonu, e le i faigofie foi i le Kapeneta. E i ai lava le lafoga o lo o aumai i totonu o le Tusi Paia e limataitaiina ai, *'o le mea e iloa e le tagata e tatau ona fai ae le faia, o le agasala aiai lenei i luma o le Silisili Ese.'* Lau Afioga i le Fofoga Fetala'i, o le tulaga lenei, ona e i ai taimi tatou te lauga ai faapolokiki, lauga faapolokiki aua le faafofoga mai a le atunuu ae i ai foi taimi e ia oo ifo i o tatou loto, o iuga faigata faapenei, e le faia e se Kapeneta, e palaaai e fai le mea e tatau ona fai.

Lau Afioga i le Fofoga Fetalai, ou te faafetai foi i le lototele o le Kapeneta i le latou talia o le talosaga mai a le Afioga i le Minisita, ia ona o le tulaga ua faataua e le Minisita o le isi lea auala, e mafai ona matua taofi, taofi lava le toe faaulufale mai, lea na taofi ai ia siusiupipi. Ae o le a le mea lea ua tupu? Ua taofi, taofi, taofi toe tatala, ona o le mea lea o le tagitagi mai o tagata aemaise le faaulufale mai i i Amerika Samoa. E faapena foi le alalaga o tagata i le taimi o le faatu o le tatou falepia, o le mea o le a agasala ai le atunuu leni. Ia faapena foi i le tapaa, o lea e i ai lava ia latou e tetee pea i nei mea o le tuu i luga o le tiute, ae pau lea o le mea e fai e le Malo, tuu pea le avanoa e fai ai le filifiliga saoloto a le tagata, ae pau foi lea o le mea e tau taofiofi ai ia le tagata, na o le pau lava lea o le mea o le tuu i luga o le tiute, e tau taofiofi ai, le tatou agai e faaoga mea sese e tiga lava ona tatou iloa, e sese le mea lea e fai ae fai lava.

Lau Afioga i le Fofoga Fetalai, o le tulaga lena, e tiga ona tatou iloa o le mea e le tatau ona fai o le taumafa i mealololo e pei ona faasilasila mai pea e latou o fomai o mea ia e maua ai le faamai oti ia e valu, e tusa e valu ia faamai e soosootauau ona o mea tatou te inuina po o taumafa tatou te taumamafa ai, fai lava ma le iloa, ae e i ai lava le upu foi lele, se e lelei lava le oti i meaai, e lelei lava le oti o meaai, ae le o le oti i le fia ai. Ae o le faalavelave la lena, e amata loa ona sau tiga, ona laga mai loa lea i le Malo mo le fesoasoani ua fia ola, ia ona liliu loa lea o le Malo e faatino ana faaiuga e saili ai togafiti ina ia togafiti ina ia ola.

Lau Afioga i le Fofoga Fetalai, o le mafuaaga atoa lena, ae o le isi lea faaiuga e le i faigofie e le Kapeneta, ona o le naunau o le Kapeneta ina ia silasila foi i mea e taumamafa ai le atunuu. O le taimi leni a tupu le oti, se o le tele ia o le mea o le faalupega o au nei o le Tama o le atunuu, ua fai ma mea e omai uma ai lava tagata e tutupu loa latou faalavelave ona omai uma lea ia te au, o pili o totogi o moli, o mea o faamati, o mea tau meaai se i aai ai le fanau. Ua ou le iloa. E ta te fiu e fai i ai, o faalupega lena, o mea taufaasee. Ae tofu lava le tagata ia ma lona tama, e le o au o se tama o le atunuu. Ia na toatamai ai foi Le Ao O Le Malo talu ai, i le faalupe o au, o au o le Tama o le atunuu, ae o le Tama moni lava o le atunuu O Le Ao o le Malo, a o au, o le Taitai o le Malo, o si ou tamai faalupega lena, ae e le o au o se Tama o le atunuu, e tofu lava le tagata ia ma lona ia tama.

Ae a sulufai mai la ia te au, ona ou fai loa lea i ai, o le a la le mea e te manao i ai? Ou te manao i se tupe e fai ai le mea lea, e faatau mai ai ma pusaapa. E leai se pa moa a le tou aiga? E matua leai lava ma se mo. E leai se pa puaa? E matua leai lava ma se mea, ae la ou te iloa la e pepelo. E pei ua faigofie foi lele ona savalivali faapea tagata, ae le o e fai mea ia, e fai ai ia faalavelave pe a tulai mai, ae ua faigofie ona agai e savalivali, ia ma o e saili faipule, e tua i ai ia mo le mea lea o le paie.

Lau Afioga i le Fofoga Fetalai, o tatou lava, e tatou te nonofo ma faapaie o tatou tagata, o tatou upu foi, e mafai ai ona tatou faatalitonuina tagata, o mea e fai ai faalavelave, na e i lalo o fuesaina na e tele ai o tatou fanua lea e fai atu e faaoga tatau, ae lea e tetee ai isi e aua le faia e taatitia ai pea fanua, tusa po o a faalavelave fai, ae taatitia ai pea fanua o le atunuu. O le ala lena o lea e malosi ai le finagalo o Minisita nei e faaoga o tatou fanua, aua e tele fanua o i matou ia e feoi solo e asiasi, matou te le nofononofo, ona iloa ai lea o le tele o fanua la e taatitia e le o faaogaina.

Lau Afioga i le Fofoga Fetalai, o lou toe faaopopo atu lea i le Tulafono.

**FOFOGA FETALAI:** Malo, faafetai. Ia tulai mai le sui usufono, leaga o lea ua tapena mai le sui usufono mo Salega Sasae.

**Tofa OLO FITI AFOA VAAI (Salega Sasae):** Faafetai i lau Afioga i le Fofoga Fetalai mo le avanoa, ou te manatu o lea ua maea tapa tuli o le tata i le tatou faafetai siitia i lenei taeao, taitai mai foi le soifua a lau Afioga i le Fofoga Fetalai, aemaise foi le Afioga i le Palemia ma le aiga Kapeneta, ia ma le mamalu foi o le Palemene nei, Faauluuluga o Matagaluega ma Ofisa eseese.

Ae ua ou tulai ma le agaga faaaloalo lau Afioga i le Fofoga Fetalai i le Tulafono lenei. E le na ma le laina lau Afioga i le tulaga o taumafa ua i ai le tatou atunuu ma o lo o faaaogaina e le tatou atunuu i lenei vaitau. E pau lava lea o le mea o lo o toomaga i ai ia lo tatou atunuu i taumafa ese, o le mea lea o le moa. Ia ta te faalogo lava foi i le pese a tagata e moa mai i lava le Aso Gafua e tau i le Aso Sa o moa. Ia na pau foi lena o se taumafa manu tuu aisa e gafatia e lo tatou atunuu i le vaitau lenei.

E lagona lava le faanoanoa foi lea, talofa e i si o tatou atunuu i le tulaga ua aumai ai nei le Tulafono Tau Faaofi lea, ua toe sii i luga. E moni ai lea o upu foi lea, 'e tatou te momoe i manu ae atiae i mala le mea lenei.' Sa leai lava se mafaufau o le a oo ia le Afioga i le Minisita i le tulaga faapea. Ia o le a tasii la o le auga ma le faamoemoe o le taofiofi o mea o se tulaga i faamai ia e pei ona taua e le Afioga i le Palemia. Ae o le a le mea na aumai ai? Pe afai o lea e gasegase ai le atunuu i meaai ia e aumai? O le matuai ou ofo au i le tulaga e pei ona aumai nei.

A o le fesili, o fea tatou polokalame prevention programme a le tatou Health e faatino ai le mea lea? O le tele naua o tupe e faatino ai polokalame ia, ia na alu alu tu. O mea a tatou, e alu alu tutu, toe savavali, toe tutu, ou te manatua lava tufaga laau foi ia e fai ai mo faamalositino i tua i o tatou loomatutua, ia ua leai foi ni mea o na mea.

Ae lau Afioga i le Fofoga Fetalai, ae se i tuu foi la i luga le moa ae se i tau tuu mai i lalo le mamoe. Masalo o le 90% o le atunuu nei lea e le taumamafa i se mamoe, ona o le taugata. Ia a o lea foi ua tuu mai i i i totonu o le lio o le 3 lea, pipi, moa, mamoe, ua le iloa e le tatou atunuu po o a mea o le a taumamafa ai. E pei o se atugaluga lena lau Afioga i le Fofoga Fetalai i lou sui usufono, se i faamolemole lau Afioga i le Minisita toe silasila ifo lava i le tulaga lena, ma silasila foi la i le tulaga o lea lava e tilotilo nei o vaemoa ma mea ia, e pei na aumai vaemoa o mimiti mai o i atunuu ia ae oo mai i i, ua pepeti. Se i silasila i le tulaga lena mo mea o vailaau o lo o faaaogaina, e tasi lena o vaega o lo o tuuaia ai mea ia o faamai ia e gasegase ai lo tatou atunuu, o mea o taumafa na e aumai. Ae ou te iloa lava e le o se tulaga faapea, ua ta le iloa po o le a le mea ua tasii ai nei i luga nei mea? O la ua faafofoga mai lo tatou atunuu, o le matua tou le alolofa lava, aemaise lava lau Afioga i le Minisita, ma le faiga o nei tulaga faapea, ia ma le agaga faafetai ma le faaaloalo.

**FOFOGA FETALAI:** Ia o lea ua maua atu le finagalo o le sui usufono. Malo faafetai, ia se i tulai mai le Minisita o la ua tulai mai.

**Afioga Hon Tialavea Fea Leniu Tionisio Hunt:** Lau Afioga i le Fofoga Fetalai e matuia le saunoaga a le sui usufono, ona faapea o le lē alolofa i le atunuu. Faatoa uma nei lava ona faamalamalama e le Palemia ona o le alofa i le atunuu o lea na taumafai ai le Tulafono Tau Faaofi lenei. Afai lava o le

finagalo lea o le sui usufono ia e le alofa i le atunuu, ia o lona lava finagalo lena, a o le Kapeneta ma le Malo, e galulue uma lava ma mea fai uma lava. E fai mo ai? E fai mo le atunuu. Ia leaga o le natura lava lea o Levaopolo foi po o Olo? Ona o lea e lua suafa o le sui usufono, ae o le agaga ia o le Tulafono e leai e le o le lē alofa i le atunuu, ona o ni auala e mafai ai ona... O aso ia a o matou laiti, se e tofu lava le loomatua Samoa ma le pa moa. E fai lana lafumoa e tuu i totonu o atigipusa i le tala o le fale, pe a faapea na nofo i tua ia le sui usufono lea, o moa na, e fofoa. E aumai e le loomatua fai ai le keke i fuamoa, a ua tele ifo le matuamoa fai ai le mea tausami a le aiga. Sa ola lelei e le i tuu aisa ni meataumafa tuai. O le agaga lena o le Malo o lea e taumafai atu, ina ia toe foi i tua, e taumafai e toe maua ia le tatou taumafa tuai lena, tofu le... O le mafutaga a tina, ou te talitonu e pau lena o mafutaga e mafai ona faia le tulaga lea. Po o le a foi le taumafai o le Ofisa o Faatoaga i pa moa nei, a le avea i tina i tua i komiti e latou te faia ia pa moa, pa puua, tulou, o fofoga taumafa e maua fua, e leai se tupe e alu ai. O la e tele popo e fafaga ai le moa, fafaga ai meaituaolo, o la e maua i totonu o Samoa ia mea ia e fafaga ai.

Ae i le siitaga ia o le mamoe, ia o lena tatou te iloa, o le matua lololo lava. O lena foi ua e taua mai ia vailaau na e i totonu o moa. E lua lava mea e mafai ona fai e le Malo, aua le toe aumaia se moa, aua le toe aumaia se mamoe, aua le toe aumaia se mulipipi. O le a la le faalogona o le sui usufono lea? E tataua ona fai? E leai se mea. O meaai taumafa ia o lea e tuu atu le choice i le atunuu e fai, ae pei ona silasila atu, e tua lava le Samoa ia. E oo foi i le Tulafono Tau Faaofi lena, e oo i faamomoli o le siusiupipi e aumai i Tutuila ma pusamoa, e tax uma. E le toe talia le aveese mai le exempt o lo o i ai nei, so o se faamomoli e aumai, o le naunautaiga lava, taatia. Ae faaaoga ifo ia tatou... ona o le mafuaaga tele lena o lea e alo ai le tatou atunuu, ona o le faamama avega lea i le tiute i faamomoli ia e aumai. Ae lea e uma ifo ua oo i faleoloa, ia o le tali atu lena... o le Kapeneta lena e tumu le alofa i le atunuu.

**FOFOGA FETALAI:** Malo.

**Tofa Olo Fiti Afoa Vaai:** Lau Afioga i le Fofoga Fetalai, na o sina mea lava e faamalamalama atu, ona o lea ua tali mai le Afioga i le Minisita.

**FOFOGA FETALAI:** E a pe a faamalie atu, ia o le a faagasolo ia le tatou galuega, aua o lea o le a tulai mai ai foi se isi faafinauga.

**Tofa Olo Fiti Afoa Vaai:** Leai na o sina tamai mea lava lea faamolemole...

**FOFOGA FETALAI:** Leai malie le sui usufono, malie le sui usufono, leaga o lea sa e tulai ma saunoa mai, sa olo le fua a le Malo, ae o lea la ua fai mai le fesoasoani le faamalamalamaga a le Malo, o lona uiga a e saunoa, e toe saunoa foi le Minisita, ia ona fai lava lea ma oulua ia le tatou fonu ae faafefea isi sui? O le mea la lea se i tulai mai le sui usufono o Palauli le Falefa, faamolemole, sosoo ai lea ma le sui usufono mo Gagaifomauga Nu.3.

**Afioga Hon FAUMUINA TIATIA FAAOLATANE LIUGA (Palauli le Falefa):** Faafetai i lau Afioga i le Fofoga Fetalai mo le avanoa, faafetai foi i lena taeao ua maleifua mai le Taitai o le Malo, Kapeneta ma le Palemene.

O lenei Tulafono Tau Faaofi o se Tulafono ou te matua lagolagoina, aisea? Tasi lea auale e fesoasoani ai i le soifua maloloina o tatou tagata. O lea na saunoa le Afioga i le Palemia, o le vaega lea ua iai le mai suka i le taimi lenei, ua ova i le 130 tagata ua faamama o latou toto. O le tupe e alu ai a le Malo, e ova i le \$7miliona. O tatou tagata ia e ave i Niu Sila ona o mea lava o gasegase o faamai le pipisi, o le isi 10 ma ona tupu miliona, o lona uiga, o lea tatou te talanoa i le fesoasoani i le maua o le soifua maloloina, ma faaauau ai pea ia soifua o tatou tagata, o lo o mananao tatou te nonofo faatasi i le olaga faaletino o lo o fai nei.

Lau Afioga i le Fofoga Fetalai, sa ou faapea e tuu i ai ma mea mo isi taumafa o faamai le pipisi foi. Ua uma ona ou talatalanoa i nisi o fomai, o le mea lea o le saimini, lea e tele ina taumamafa ai lo tatou atunuu, lea foi ua ou maua i totonu o lenei Palemene, e i ai foi ia sui usufono ma Minisita ua maua i le gasegase lea, e slow ai le mafaufau. O lona lua, e loto galo ai. O lona uiga, afai e te le manatua au mea na fai, ua e maua i le gasegase lea, e le pipisi, ae ala ona maua, o le malosi o le masima lea e i totonu o le pepa saimini. Ua tatau foi la ona tiute. E tatou te le o vaai i vaega ia lau Afioga, ae taua, e tatau foi ona fai se tiute. Aua o nai masima ia e i totonu i i, e matua afaina ai ia le soifua lelei o le tagata. E ala ona taua le Tulafono, toeitiiti limaselau tagata o lea ua i le border line i le taimi lenei mo le faamamaina o latou toto. E tau mai ai i, o lea o le a faalimaina e oo lava i le faasefuluina ia le tulaga, a o lea lava e tatou te naunau ina ia fesoasoani i aiga o lo o pele pea nei tama, tina e oo lava i fanau laiti ua 20 ma ona tupu tausaga ua maua i le mai lea o le faamama o le toto, o le taua ia, e mafai ona tatou taofia, ae o le a tatou aia foi i le filifiliga a le tagata e faaoga le mea e finagalo i ai. E masani ona ou alu i fale ia e faatau ai ia aiga, tusa o lea ua legalise ai i, o au foi ia a ou toe manao e aumai sau fasi pea, ou te manatua lava mea nei o pea pe a mafaufau ia Sala, aua o le tagata lea o le matua....le Afioga i le Minisita, o le poto e kuka le mea lea o le pea, e ui lava ina faasa i le siosiomaga ae maua lava pea a le Afioga i le Minisita, ou te le iloa po o sana ia foi pa pea. Lau Afioga i le Fofoga Fetalai, a ou fesili atu i ai e aumai sau fasi pea, ae fai mai, o le pipi, ou fai atu, e le o se pipi, ae o lona uiga o lena e te solitulafono ua e faatau le pipi, ia o isi fale e \$4 i le siusiupipi e tasi, e \$3, ia ae le mafai ona e taofia lou fia uina, tulou, e u atu ae pei e pao, o le manaia o le gao, ia a tasi lava i le masima e le afaina, ae a fai fai soo, e te afaina ai.

Lau Afioga i le Fofoga Fetalai, ou te matua lagolagoina le Tulafono Tau Faaofi e fesoasoani ai i aiga o lo o mananao e nonofo pea ma o latou tuua, matua, alo ma fanau, pe a mananao e faaauau le latou mafutaga ia maua ni tupe e fai ai mea o lo o naunau i ai. Ma lou faaaloalo lava, ia manuia faafetai.

**FOFOGA FETALAI:** Malo. E ese le manaia, e le faafuluina foi le saunoaga a lau Afioga i le sui usufono o Palauli le Falefa. E aumai lava le faalifu e faapena ona logolelei i le taumafa. Malo faafetai.

Se i tulai mai le sui usufono mo Gagaifomauga Nu.3 ona sosoo ai lea ma le....ia se i faamuamua ia le tamaitai sui usufono pei ona tulai mai, malie lau Afioga Laauli.

**Afioga FAAULUSAU ROSA DUFFY-STOWERS (Gagaifomauga Nu.3):** Faafetai i lau Afioga mo lou avanoa. E faatalofa atu foi i lau Afioga i le Fofoga Fetalai, le Afioga i le Taitai o le Malo ma le Sui Palemia, faapea sui usufono

mamalu o le Maota, faapea Samoa ua potopoto ia ma Samoa o lo o faafogafoga tapuai mai.

Ae e fia faaleoina foi se manatu e tusa ai foi o lenei Tulafono Tau Faaofi. E piiama lou sui usufono i vaega uma lava e pei ona folasia le agaga o lenei Tulafono Tau Faaofi ina ia faaleleia ai le soifua maloloina o lo tatou atunuu. Ae po o silasila le Minisita i se isi auala e ono mafai ai ona accommodate le tulaga lea, aua o lea o le a siitia nei le tulaga tau taumafa nei, a o lo o i ai foi isi taumafa e fesoasoani ai i le mamalu o le atunuu i o latou soifua laulele, soifua manuia, ae oka se tauagata, ma o i latou lava e lelei a latou galuega ma faigaluega e lelei totogi, e latou te mafaia le tau o le oloa lea. Ae paga lea e na o le pau lea o nai vaega oloa e ono mafai e se pay o se tagata faigaluega, average ona ausia, o le tau o le pusamoa ia ma le tau o le apa eleni. O le isi foi mea e silasila i ai le Afioga i le Minisita, o apa eleni i lenei vaitau, oka le tele ma le eseese o apa eleni lea ua i ai lea e tele ina taumamafa ai le lautele o le atunuu, a o isi eleni ua faaletonu, o le tele o le recycle lea e alu, aumai i i, aumai i i, aumai i i, ae la ua leva ona expire. Po o i ai ni aiaiga ina ia mafai ai ona mataituina ia eleni ia e circulate mai lea faalavelave i lea faalavelave, o la foi e tupu ai le mai i eleni ia ua expire, ae na pau na o meaai e mafai ona tua i ai le mamalu o le atunuu ona e taugofie. Ou te lagolagoina pe a faapea o le Tulafono lea, o le a matua fesoasoani ai i le soifua manuia o tagata ma le lower ina o NCD rates ia e i ai. Ae ou te talitonu, tailo, tailo pe mafai. Ona e na o le pau lea o le meaai lea, tulou lou gutu ma le afi, e mafai ona afford e le tagata average worker o le pusamoa lea e tau taugofie mai. Ae o se manatu vaivai, pe le ono mafai la ona maua nei fesoasoani e nuu ma afioaga e mafai ai ona faatauina ni pa moa ma ni pa puua faatau mai, ona faamatuu atu lea i ai e o ai e faamalosi ai le faiga o pa moa ma pa puua, ina ia mafai ai ona maua taumafa e tua i ai le mamalu o le atunuu.

Ia o se vaivaiga lea ma se manatu vaivai, ma lou faaaloalo faafetai.

**FOFOGA FETALAI:** Tulai mai le sui usufono mo Gagaifomauga Nu. 3, Afioga Hon Laauli Leuatea Polataivao Fossie Schmidt.

**Susuga Hon LAAULI LEUATEA POLATAIVAO FOSSIE SCHMIDT (Gagaifomauga Nu.3):** Faafetai lau Afioga i le Fofoga Fetalai, viia le Atua i lenei taeao, e ofo alofa atu foi i lau Afioga i le Fofoga Fetalai, le Taitai o le Malo ma le Kapeneta ma le Fonousu a Samoa.

O le a soofau atu ia so ma lagona, o lena ua motu atu motugaafa a le sui purinise olenei itumalo. O le Tulafono Tau Faaofi lau Afioga i le Minisita o Tupe Maua, e manatu e le o se mea fou le mea lea o le tulai mai pea o Tulafono faapenei i taimi uma ma taimi uma ma Paeaiga uma. E i ai lava lea vaitau e tulai mai ai foi le e Minisita o Tiute ma faapea mai, ia o tatou oloa nei o le a tatau ona tasii ona o mafuaaga nei, ia tolalau mai loa. A o le faalogologo i lenei taeao lau Afioga, ia o mea masani lava, e feapaapaai ma feulufai le aafiaga o le Tulafono leni i Matagaluega eseese o le saofaiga a le Kapeneta ma le Malo. Pei ona faafogafoga le mamalu o le Maota, ia e i lau Afioga i le Minisita o Tupe Maua e faatu le Tulafono, ia ae agai e fai ai le puipuiga o le soifua maloloina. E le toe oo se tala o lea ua malamalama Samoa i tulaga uma na tatou omai ai i le 20 tausaga talu ai, faalauiloa, faamatala, faamai oti, faamai le pipisi, suka, toto maualuga, ma le tele ma le anoanoai o aafiaga o le tagata e maua ai. E faapena foi lau silasila i le tulaga o le tatou taumafai e uunai le



Matagaluega o Faatoaga ma Faigafaiva, ia toe tagata i mea ia na taua atu i saunoaga a sui usufono ia toe fai uma a tatou natural products, atinae povi, puaa, moa o mea o lo o galueaiina i totonu o lo tatou atunuu, ave ifo i ai ma le lagolagosua malosi a le Minisita o Tina ma Tamaitai, Atinae o Nuu, Afioga ma Agafesootai, o le cycle lena e atoa uma ai le tulaga o le fusi o le fau o Malo i Matagaluega uma ma Minisita e aafia i lalo o le saunoaga a lau Afioga i le Minisita o Tupe Maua, ia atoa ai ma le faataavalega o tupe e maua mai i tiute o mea nei o le a tasii, e faatupe ai e le Minisita o Tupe a tatou atinae.

O le agaga la o le tulai atu lau Afioga i le Minisita, e avatu le tuualalo ma le faamanatu, it's all about implementation o le Tulafono. Ma e leai lava se aoga e tatou te talanoa, talanoa nei, talanoa taeao, talanoa tala atu taeao, o le tiute lea o le a sii e fesoasoani ai i le soifua maloloina, o le uunaia o faatoaga, pa moa ma mea...maua tupe e fund ai le budget, ae a le faatinoa lelei le implementation, maimau le taimi. O le tuualalo lena lau Afioga i le Minisita o Tupe Maua, leaga e leai se isi mea e te fesuluai solo ai e fai mea ia. O oe le tagata e aupito i sili ona tuituliapu e le Malo e sue tupe. Faafefea la ona sue? Ia na ona matou oloolopitovaa ma matou tuitui malofie, tautuana le implementation o Tulafono nei tatou te fai. Aua e leai ma se aoga, o lea lava tatou te vaai, smuggle, aumai mea e le talafeagai e le sao mea e tuu mai, ae na ona matou faalatalata atu, tautuana le faatinoga o galuega, e le tauvaleina le Matagaluega, e leai, o le tuualalo ma le faamanatu ina ia faatino lelei, aua o tupe e ao, e aoga mo le atunuu, e le o se isi tulaga, ae a atoa a tatou faamaumauga ma mea uma e faatino ai, ia a mea o le ula lena. E taua foi le tulaga lea leaga o lea lava e tatou te lauvivilu lau le maisuka, lau toto maualuga. Ae o la foi e i ai le tulaga e tatau foi ona ave le faamalosi i le Matagaluega o le Soifua Maloloina, polokalame faalauiloa, polokalame faamanatu ia ma faapena foi. E faapena foi le tuitui i le Matagaluega o Faatoaga, ae paga lea, o lena e tou te silafia lava lo tatou atunuu. E tatou te fai atu lava o lea le lelei, e fai lava le loto, e fai lava le finagalo o le tagata ia. Ae na ona matou fesoasoani atu i lau pitolaau lau Afioga i le Minisita o Tupe Maua, ia alofagia le aufaigaluega i le faatinoga, le aoina, le koletiina, le siakiina ma le vaavaaia, leaga o lea lava e tatou te vaai, o lo o i ai pea tulaga o lo o tulai mai. Ae lafo atu, lafo atu ma le talitonuga e mafai ona implement le implementation o Tulafono uma tatou te pasia ina ia taatia i lagotonu ma aoga i le atunuu. O le tuualalo lea, ia manuia le Fono.

**FOFOGA FETALAI:** Malo faafetai saunoa. Se i tulai mai le sui usufono mo Alataua Sisifo.

**Afioga ALIIMALEMANU ALOFA TUUAU (Alataua Sisifo):** E faatalofa atu i lau Afioga i le Fofoga Fetalai e faapea le mamalu o lenei Palemene, e le gata foi i lea o sui o Matagaluega ma auaunaga eseese ua tatou mafuta i lenei taeao.

E puupuu lava se manatu o Alataua Sisifo e lagolagoina ai le Tulafono Tau Faaofi ona o le itu lenei. Ua uma ona pasia le tatou Tala o le Tupe 2017/2018 lea na i ai le saunoaga a le Afioga i le Minisita o Tupe o le a toe fetuunai pasene o tiute ma saofaga e maua ai le \$2.53miliona lea e faagaoioi ai le tatou Tala Faataata o le Tupe o lenei tausaga. Ia o le itu muamua lena e ala ai ona lagolagoina ia le tulaga lea, ona ua uma ona tatou pasiaina le Tala o le Tupe e faatupe ai ia tulaga ia. Ae e piiama i le saunoaga a se tasi o sui usufono mai

Gagaifomauga Nu.3 i le tulaga lea o taumafa nei ua masani ai tatou i aso fai soo ia a o taumafa ia o lo o ave i ai le faamamafa e siitia. Ona toe lagolagoina lea o le manatu lea, e pei lava ona fai mai isi faalauiloa a le Matagaluega o le Soifua Maloloina, e sili atu taumafa ia e aumai sao lava nai lo i taumafa nei e process. Ae pe tagatagai ane, pe a se finagalo i se faiga faapaaga a le NPF ma le tatou Faletupe o Atiina Ae Development Bank, ina ia mafai nei ona i ai ni vaegatupe e faasoa atu i se tuutuuga o tului mama mo tua i communities mo tua i alaafaga, pei ona malie le saunoaga a le Minisita o Tupe Maua, seiloga o tua i communities i vaega o tina ma komiti ona mafai ai lea, ou te talitonu ona mafai ai lea ona fai o ituaiga projects nei e fai ai a tatou pa moa, ia o lea foi e maua mamoe, ia ma fesoasoani ai i le atinae o taumafa nei lea ua siitia i luga a latou tau. Ia o se manatu lena e faapuupuu ai le lagolagoina ma le fesoasoani atu i le tatou Tulafono Tau Faaofi. Ia manuia le Fono.

**FOFOGA FETALAI:** Malo faafetai. E ese le manaia o finagalo e faali mai, se o mea anoa e aumai i luma e vave ai foi le tatou galuega.

Se i tulai mai le sui usufono....Malie se i tulai mai le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai e faapea lava ona fefaasoaai le Palemene i le Malo i lenei itu ia ma le tatou Itu Agai HRPP i le la itu. Se i maua foi sina manava ona o le Tulafono nei e le faigofie, ia ae se i fai foi sina toe faaopoopo ona e taua ia o finagalo ia ua faaalua, ma o finagalo e tataua ona matua faafogafoga lelei i ai ia le Minisita o Tina ma Tamaitai, Atinae o Nuu, Afioga ma Agafesootai ma le Minisita mo Faatoaga ma Faigafaiva, ma le Minisita foi o Tulaga o Fale Gaosi Oloa i totonu o Samoa. O latou uma ia e tofusao i le faatinoina o fautuaga taua tele ia ua aumai e a outou Afioga i sui usufono mamalu o le Maota.

O le vaega lea o tina, a tatou talanoa loa i pa moa ma pa puua se i tulou, e leai lava nisi e faatinoa mea nei, o le Matagaluega lena e aupito sili ona tele lo latou sao i fonotaga a Pulenuu po o Sui o le nuu i alii ma tamaitai. A o i pa moa, e leai lava se isi e faatinoa, na o tina. E ta te malamalama lelei, atonu o le toatele o outou tou te le i faia le mea na ou faia, o le sake mai loa o le moa ou makaina le tuapola na sakesake mai ai le moa, ona ou totolo loa lea i ai, a o lea faatoa fa ou tausaga. Na ou ai fuamoa mai lava o ou laititi, e ala ai ona ou iloa lelei a misa le matou aiga i mea sa tu ai le fale o lea, tu ai le fale o lea, ona ou fai lea i ai, faalogo lelei mai, e leai lava se isi o le aiga nei ou te le i iloa le mea na nofo ai, ona e leai se matuamoa a se aiga ou te le i pai i ai.

Lau Afioga i le Fofoga Fetalai, o le taua ia o mataupu nei ma o lea foi e faafogafoga atu, aemaise lava le itu lea o le faatinoina o fuafuaga, o lea e taua le ulufale mai o mea eseese nei smuggle. E taua foi le fuafuaga lea e saunoa mai ai isi, toe tilotilo i isi oloa ia. O le a ou tau atua le pisupo, atonu tasi lena mea e tilotilo i ai, e le gata i le oona, e matua maoae le oona o pisupo fou ua aumai nei ae faapena foi ma le lololo, ae tilotilo pea i ai. Ma le fautuaga lea i le tele o nei pusaapa aua o le mea moni lava, o pusaapa eleni, o le mea lea sa tatou aai ai le toatele, e ui lava ina tilotilo mauualalo i ai le toatele o tagata, ae masalo o tatou uma lava sa amata mai le eleni. Sa leai foi ni mai na tatou mamai ai i na aso, a ua tele naunau mai i nei aso, o mea la ia o moa, o mealololo ia. O lapisi uma lava ia e talau uma mai i inei e Niu Sila, o mea o lau mamoe. O lapisi lea e lau mai i Niu Sila. E faapena foi la Amerika, o lapisi mea ia e lau

mai i moa, a ua tatui i ai vailaau. E taua lava la le faatupu manatu i le taeao lenei.

E i ai si mataupu lea ou te fia faailoa, o au na feagai tonu ma le tetee lea na savali tetee ai le atunuu i le 1994, ona o le Tulafono lea o le Lafoga o le VAGST. O upu sa lafo i lenei taimi, talofa i le atunuu i le tulaga o le a oo i ai le pagatia ona o lenei lafoga. Na matua nofonono ai le Itu Agai ma fai ia... e atoa le vaiaso o pepese i fafo ma tauemu i le Kapeneta i lenei taimi. Ona uma lea ona pasi le Tulafono ia luni ae tolu le faatinoga mo le ono masina se i galulue le Matagaluega o Lafoga e faamalamalama i le atunuu le VAGST lea ua alu le upu, o le a matua mafatia le atunuu. O le a la le mea na tupu? I le tele o upu na alu, ae oo ae lava ina ua faaalu le VAGST, e le i afaina ai ni tagata, e leai lava ma nei mea sa valoia o le a tupu ona o le mea lava lea o le polokiki foi lele na faalotoleagaina ai le atunuu e savavali ma pepese, meamanu lava e tele faalavelave e tutupu mai ai. A o le toa o le Taitai o le Malo, toa, a ua i ai ia Minisita ma sui usufono o le Vaega lenei ua amata ona talanoa o le a faafetaui lava le malosi i le malosi. A na tupu le mea lenei, talofa ia Samoa i lenei taimi. A o lea la na oo loa lava ina amata faagasolo, solo ia na amata mai le 1994, 1994, 1995, 1996, 1997, 1998, e lima tausaga o faagasolo solo tetee nei, na iu lava ina malepelepe ai le Itu Agai i le fai pea o solo tetee a o la e ua na o le savavali o tagata ae le talitonu i nei solo tetee na fai. Ua amata ona fanau mai ma faamaonia upu a le Malo na avatu.

O le tulaga lea e i ai mea nei o tau, aua o le mea lava lea, e sii loa le tiute faapea; talofa i le tau o le a oo i ai, ae i ai le mea tele lava lea e i tua e masani ona le oo i ai o tatou manatu, o le faatulagaga o le tau o oloa, e faatulaga i le malosi i tua mai, e faaupu e i latou o economist o le force of supply and demand, ae faauigaina i le faa-Samoa, o le malosiaga lea i tua atu e pulea tau o oloa o le manao o e faataua oloa ma latou e ana oloa ia e faatau atu. O i ina e faavae ai tau o taavale afi, o i ina e faavae ai tau o araisa, o i ina e faavae ai tau o ia ia e faatau i nei, o i ina e faavae ai tau o apa eleni mai fafo, o i ina e faavae ai tau o so o se ituiga oloa e sau mai fafo, o i ina foi e faavae ai tau o a tatou taamu ma a tatou talo. E tasi lava le Tulafono lau Afioga, e tasi lava le Tulafono o le Tulafono o Demand and Supply. A oo la ina ou faaaogaina le gagana tuusao, ona ou faaaogaina lea... ou te le faaaogaina le gagana lea e faa-Samoa sao mai le faa-Peretania, o le gagana ou te faaaogaina ma upu ou te faaaogaina, o le Tulafono o Aso Oge ma Aso Mau. O le Tulafono e pulea tau o oloa, o le Tulafono o Aso Oge ma Aso Mau. E oge loa, luga tau o oloa, a oo ina mau, lalo tau o oloa. E oo foi la i tau o mea ia, a oo lava ina tele le demand a le lalolagi, e oo lava i le tiute lea, e faigata tele ona ia taofiofia i luga se tau, e alu ifo uma lava i lalo le tau o oloa. O le mea la lea o lea ou te taumafai ai e faamatalaina atu. O le tau o le susu na oo i le \$7. O le a le mea lea ua i ai? O isi taimi ou te alu atu i le faleoloa ua tai \$2, tai \$3. O le malosi o le competition, o le tulaga o le fefinau ai ma le faatauva lea e fai mai ai isi tagata, o le omai o nei Saina... Ae a na leai latou, e le alu ifo i lalo le tau o oloa. O lona uiga, o nei foi mea tatou te faia, e alu alu lava, a o le malosi o latou ia ma le faatauva e faavae i luga o le Tulafono o Aso Oge ma Aso Mau, e pulea uma lava oloa i le lalolagi lenei tatou te i ai. Na pau lava lenei o le Tulafono na te faafoea tau o so o se oloa o lo o maua i le lalolagi lenei, o le Tulafono o Aso Oge ma Aso Mau.

Lau Afioga i le Fofoga Fetala'i, e tupu la le savali lea o tai \$100 le tau o le pusaapa. O le a le mea na fai e le Malo? Tipilua le pusaapa eleni, lea la e taugofie ai nei aua faalavelave o nuu. E leai se mea e taofia ai tulaga ia i le

tilotilo i ai a le Malo aemaise le Minisita e fitoitonu i ai le Tulafono, silasila i pusamoa aua faalavelave. O le tele o isi aiga, e avatu le pusamoa, e fiu e tausami le pusamoa, ona oo lava lea ina fai faatuatuvale foi lea ona fai ma atili ai lava ona mamai. O le mea la lea, e taua tele fautuaga ia, lafo mai i le Minisita o ia foi lea e i ai le malosi lea na te faatonutonuina ai mataupu nei e pei ona aumai ai, e toe fetuunai ai pusamoa nei lea e faalagolago i ai faalavelave o le atunuu leni. E leai lava se mea e sau ai leni pusamoa tele. O le mea lea e tupu, e le faigofie foi le tau tasii i le mamafa, ae tele lava le mau auala e skin ai le cat, o le mea lea o lea ua aumai nisi o fautauga lau Afioga i le Fofoga Fetalai, e taua tele fautuaga i le taeao leni. A o nei lava mea o tiute, o mea ia e sao ai se tasi foi saunoaga, e le o ni mea fou, ae a oo loa i le tulaga tatou te tagofia ai le soifua maloloina ma mea ia tatou te taumafaina, o lea lava e ia i tatou uma le auala e mafai ai ona faatino o tatou tiute, e le gata i inei, a o tatou nuu.

O au na amataina le polokalame lea o le taofiofia o le faamai lea ae na faasee ai au e Matagaluega ia i le mea lea o le amataina, le Matagaluega lea o le Soifua Maloloina, e tatau ona ou amatamea. Amatamea i le a? Amatamea ou te alu ou te faataitaia ona ou siva i le taeao, ae tilotilo mai tagata foi nei ona omai foi lea o latou matutua sisiva, ae na amata mai la i Savaii i Salelologa. Na matou o ai lea lauga le faifeau, fai foi lau lauga, ta mai loa ma le pese pei lava faatoa ta le valu i le taeao. Ta mai loa ma le pese. O au la lea na ou alu e faataitai ona ou siva ma lulu le tino foi lele e faaalu ai le mamafa. O se mea mataga tele se Palemia le siva matutu lava i le taeao i le ta o le valu. E le o se taimi lea e sisiva ai ni tagata, ae na ta lava le faaili ma faataatia ese le mataga, ae ou siva se i tali atu i polokalame a fomaina ma tina ina ia amata le mea lea o le uunaia o i latou o vaega sisiva i totonu o nuu e faaalu ai le puta. Lea la na oo i ai le saunoaga, sa avatu mea foi nei o laaupese ma masini faaleotele leo. Na manaia. E le i umi lava ona ou siva mataga faapena i Salelologa, ae ou faalogo atu, ua oo i le 30 groups vaega siva ua fai a latou siva, e le i umi ae ou faalogo atu ua oo i le 100. A o ai na taitai ai? Na taitai ai faifeau. Ona ou fiafia lea ua manatua e faifeau o i latou lava lea e muamua faamama toto. A le faamama toto o i latou lava lea e muamua ona oo i ai seleulu i le mai suka, a le o latou o nai o latou faletua. Aua o le mea lea e fiafia tele o tatou nuu e ave tuala e taumamafa ai faifeau, e le umi lava ae vaai atu i le faifeau ua puta. O le tulaga la lena foi lele i le soifua lea tatou te soifua ai. I le taimi la na faaalu ai, pe lua tausaga ua ova i le 100 nai vaega laiti ua fai a latou siva i Savaii faapena foi Upolu nei. A o le mea lea na faaletonu ai, pei o isi vaega, ua faalagolago i le masini lea e avatu, le laaupese. Ona pei loa lea a le avatua le laaupese ua le faia. Ae o le mea na ou faalogo i ai, e oo loa i le taeao i le vaveao amata mai i le faifeau ona ta mai... ona lue lava lea e lue lava le faifeau i luga ma lona faletua, a o la e foi ua sisiva mai ia nai olomatutua aua e mafuli lava i olomatutua ae ou te le iloa la po o fea le mea ua oo i ai mea ia. E pei ona saunoa se tasi o sui usufono, masalo ua faaletonu a latou laaupese ua ave foi e se isi tata i lona fale a ua le faia mea ia. A o mea ia, e mafai foi ona tatou fesoasoani i ai.

Lau Afioga i le Fofoga Fetalai, pei o lau toe faaopoopo atu lena i le mea leni o le tatou fefefe ae oo ane i le taimi e faatino ai ona faapea foi lea, e leai lava ni vovoga o i ai, ona e i ai le malosi lea e tu i tua e toe fetuunaiina tau, e le o tiute ae o le Tulafono o Aso Mau ma Aso Oge.

**FOFOGA FETALAI:** Ia, se i tuu lava le avanoa muamua i le Minisita mo Tina ma Tamaitai, Atinae o Nuu, Afioga ma Agafesootai.

**Tofa Hon FAIMALOTOA KIKA IEMAIMA STOWERS (Minisita mo Tina ma Tamaitai, Atinae o Nuu ma Afioga ma Agafesootai):** Faafetai i lau Afioga i le Fofoga Fetalai mo le avanoa, e faatalofa atu ai i lau Afioga i lenei taeao. E faatalofa atu foi i le Taitai o le Maota, Sui Palemia ma le Kapeneta, Minisita Lagolago aemaise le paia maualuga o le Fonousu a Samoa i le Maota nei. Ua ou tulai atu e fai sina faamatalaga ona o lea e faapena lava ona felafaoi foi e tusa ai ma le Tulafono, aemaise mea nei o taumafa.

Ou te fia molimau atu i le finauga a le Kapeneta i le Tulafono a le Aafioga i le Minisita nei. E toetiiti lava a malo le faasa ona toe aumai o pipi, moa ma mea ia ua tatou talanoa ai nei, toetiiti lava a malo le matou lafo, ae peitai sa toe apaapa lava le Taitai, paga lea tatou lea ua tatou malamalama a o le faafogafoga mai la a le atunuu, faapea ai ua le alolofa i mea ia e pei ona saunoa nisi o sui usufono. Tuu ia le avanoa e filifili ai i le aiatatau a le tagata lava ia i le mea e faaoga i le tausami. Ae na i ai la le tulaga lena, tatou filifili potu i le mea, aua e fai foi o le tuu atu o le avanoa, ae sa tilotilo foi le Kapeneta i le taugata o le togafitiga. E laitiiti le tupe lea o lo o maua mai i le mea lea, nai lo le faitau miliona e pei ona saunoa le Taitai o le Malo. A o lou tulai atu, o lea e molimau mai le saofaiga a sui o nuu, sui o le Malo, sui tamaitai o nuu. O le lauga lea a le Matagaluega, o lo o molimau foi nisi o Minisita, aemaise o le Minisita o Faatoaga. Ua maea ona tolaulau atu i ai le faanaunauga ma le naunautauga, ina ia faapena ona galulue faatasi faapaaga Matagaluega uma a le Malo ma Faalapotopotoga uma a le Malo i so o se tafa, i so o se vaega. Amata mai aoga i fanau, o tupulaga, o le aumaga, tamaitai, tina seia oo i le saofaiga o lo o faapena ona faanaunau i ai mo le lagolagoina o Polokalame. O tatou o lo o tatou malamalama, tatou o omai uma i nuu ma afioga taitasi i le saofaiga la lea a alii ma faipule i totonu o nuu ma afioga. O le galuega a pulenuu o lo o faafogafoga mai, po o sui o nuu e le gata i lea o sui tamaitai, e le gata o Upolu nei a o Savaii. Ia faapena ona faautagia ia tulaga e pei ona ua faafogafoga mai foi o pese atu ai i taimi uma e fono ai, le atinae o fanau i aoga, o le soifua maloloina. O lea foi ua taumafai ia....

**Afioga Faumuina Asi Pauli Wayne Fong (Itumalo Tu Taulaga Sisifo):** Lau Afioga i le Fofoga Fetalai. Pe maua lava se avanoa se i fesoasoani atu ai i le taumafai mai a le Minisita.

O le tali a le Malo e tasi lava le latou tali, o lea ua tali le Afioga i le Palemia faapea foi le Minisita, o le tali lava e tasi. Ae pe maua se avanoa se i taumafai atu ai i matou nei e vaivai e taumafai atu. E na o se fautuaga e avatu aua le tatou Tulafono.

Ma le faaaloalo lava.

**FOFOGA FETALAI:** E tau faapena se lagona ona o lea sa.....Ae alofa le Minisita e faapuupuu maia lou finagalo, leaga o lo o i ai foi avanoa o sui usufono e saunoa ai, ae manaia foi le saunoaga faamalamalama a le Minisita, e tuutiitia ai finagalo o sui mamalu e oo i le mataupu lea ua faamalamalama. E lelei lena afai o i ai se finagalo o sui usufono, e fia fesiligia le tulaga lea o le va ma pulenuu, ma le tuu atu i tua i mafutaga a tina. O lea la ua manino i le saunoaga a le Minisita o la e faapena ona fai. O lenei lava mea sa tatou omai

ai, ua leva foi ona fai e isi Paeaiga ia pa puua ma pa moa, e back to square one lava, e fua lava i le aiga lava ma le tagata.

Ae faaiiu maia le saunoaga a lau Afioga i le Minisita.

**Tofa Hon FAIMALOTOA KIKA IEMAIMA STOWERS:** Faafetai lava i lau Afioga. Leaga ua ou tulai atu ona sa taua mai le Minisita ma le Matagaluega o Tina ma Tamaitai i nisi o saunoaga a sui usufono mamalu. O lea la e taumafai atu ai, o le galuega lena o lo o fai, ae o le a faapuupuu atu la. E pei ona ua taatia la tatou polokalame, o le tatalo atu la i lo tatou Maota aua ou te talitonu o tatou uma lava lea e i totonu o le Maota lenei, o taitai o tatou nuu ma afioaga ma o tatou itumalo. O le tatalo, tulai mai a outou Afioga, tatou taitaia o tatou nuu ma itumalo e faatino atinae nei, ina ia aua ai ne i toe mamai, ia lelei le aoaoina o aoga, ia tele taumafa e pei ona taumafai atu ai le Ofisa o Faatoaga. Tatou toe foi i le moa, puua, i'a ma figota, aua a i ai le taimi, ia. E pei lava ona tulai mai lo tatou Maota, tatou o i o tatou nuu e amata ona faataitai pe afai e le i faia i le taimi lenei. Tatou taulamua e atinae o tatou itumalo taitasi mo le manuia lautele o le atunuu mo a taeao. Soifua.

**FOFOGA FETALAI.** Malo faafetai. Masalo pe toe toalua sui usufono ia e fia saunoa i le mataupu. Faamau ifo le toa fa o sui susufono mamalu o le a saunoa pe a talii mai i le malologa masani.

*Na faataatiaese felafolafoga a le Fono Aoa mo lana malologa masani i le itula e 10:28 i le taeao ma toe faaauau i le itula e 11:26 i le taeao.*

**FOFOGA FETALAI:** Ou te talitonu ua matu i fau le taligasua, ua sao i alo foi le faasiligamalosi, e faaauau le galuega i le paia o le Palemene, le Kapeneta aemaise foi o sui usufono mamalu

E faasilasila atu ua toe amatalia Taulalumaga ma Galuega a le Fono Aoa Faitulafono. E faia la tatou malologa, o tulai mai le sui usufono mo Itumalo Tu Taulaga, ae se i faamuamua maia le sui usufono mo Vaimauga Sasae.

**Afioga SULAMANAIA FETAIAI TAUILILI TUIVASA (Vaimauga Sasae):** Ou te faafetai i lau Afioga i le Fofoga Fetalai, i se laolao foi ua aumai foi i lenei itumalo e fai ai so matou sao i lenei Tulafono Tau Faaofi ua opea i le Maota.

O lea foi ua maea le taumafataga foi ma le sailigamalosi a le Palemia, Sui Palemia ma le Kapeneta ma Sui Minisita Lagolago ma le paia i le Palemene ua sasao nei.

E muamua ona ou faafetai i le Minisita e ona le Tulafono Tau Faaofi, ona o lona manatunatu ma le sailia o ni mea e maua ai tupe aua mea e fai a lo tatou Malo. Ou te faafetai i le Afioga i le Sui Minisita sa la vaavaalua, lea ua agai atu nei i le Matagaluega o Faamasinoga ona o le tele o tulafono sa tuuina mai i lenei Palemene. E momoli ai lau faafetai i le Minisita ma lana Minisita Lagolago. O lenei Tulafono Tau Faaofi e i ai lava nai manatu laiti, e avatu e lou itumalo o Vaimauga Sasae. O le mea muamua lau Afioga i le Fofoga Fetalai, a tatou silasila i le tala o le tupe ua tuanai atu. Sa aumai ai i totonu se estimate pe \$2miliona e saili mai i vaega tupe la nei ua oo i ai le tulaga foi i le

Afioga i le Minisita. Sa manino lelei le Vaimauga Sasae i tulaga ia. Ae o lea la ua aumai i lenei itula, ua leai foi la se manatu tele e faaali i ai. Leaga ua pasia la tatou Tala o le Tupe ma ua gasea le Afioga i le Palemia e faamalamalama i lenei taeao, ia tulaga o lenei mataupu. E pau lava le tatalo i lau Afioga i le Minisita, se i silasila ane i le moa, o le moa lea o lo o i ai la tatou taumafai. E pau lea o le mea o lo o tua i ai si o tatou atunuu o le moa. Sa leai se tiute sa i ai, o lenei ua aumai ua tuu i ai le tiute. A tatou silasila i le moa se i tulou, e pau lea o le taumafai o lo o tua i ai le atunuu. Ona o le a? O le taugofie. Ae ou te faamalosi i lau Afioga i le Minisita ma se tuualalo, se faamolemole pe mafai ona faatuatuai ona tuuina i totonu o se lafoga i le moa. Se i maea ona tapena ona tapena fale moa a le Minisita o Tina ma Tamaitai lea ua saunoa mai, ona faaauau loa lea o le tax ina o le moa. O lea ua tatou i ai foi i lenei vaitau, tatalo le Afioga i le Palemia ia maua ni tama tino lelei, i si o tatou atunuu aua le au a le atunuu. Ua uma ona fai le suesuega a le sui usufono mo Vaimauga Sasae i le moa, se i tulou, e pau lea o le taumafa e maua ai o tatou tino lelei ma ni tama maualuluga ma le masoa, se i tulou, ia Leala o le masoa o le tino, o le taumafa i le moa. Se i tatou faatusatusa lava i le motu lea o Tutuila....

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai....

**FOFOGA FETALAI:** Se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** E i ai le aso na koloni ai la tatou au, ona oka lea o taumafa a tama taaalo, o lea e o uma lava i le ituaiga taumafa lea e avatu e le latou faiaoga. Na alu loa le faiaoga lagolago oka mai lana taumafa, e i ai la moa ia. Na otegia loa e le faiaoga le faiaoga lagolago, ona fai loa lea i ai, e te iloa, mataga tele le mea lea o le faataoto o taumafa e tataua ona taumafa ai tama ia, a o lea foi ua e vaai mai o lea foi ou te ai ai. E pau lea o le taumafa ua uma ona fai i ai suesuega a latou dietician e maua ai le malosi o tama, o lea foi la ou te ai ai. Ae o le fai atu o mea e maua ai le malosi o tama ma au, ae alu oe le faiaoga lagolago aumai na mealololo. Aua ne i ou toe vaai ia te oe o toe fai le mea lea, e mataga, e vaavaai mai ia tama taaalo, e le maua se faataitaiga lelei. O le tulaga lena lau Afioga i le sui usufono o saunoa nei, se saunoa i mea e te silafia, ae aua le aumaia ia ituaiga fautuaga e atili ai ona faaletonu a tatou tama taaalo.

**FOFOGA FETALAI:** O le ala foi lea o le fautua atu ai sui usufono mamalu e faapuupuu mai le saunoa ma aumai tonu le saunoaga i mataupu anoa o le Tulafono. E pei lava foi ona i ai le finagalo o le Malo, o tatou lava e tutu i luma, tatou te tutu i luma e taitai le atunuu ina ia tuuititia. O le a le aoga e atinae ai ia atamamai le atunuu ma atinae le tamaoiga i atinae eseese e i ai auala, o eletise ae gasegase laiti fanau o nei taumafa? O le tulaga lena, ae tatou tutu i luma o tatou o taitai, alu e faamuamua le soifua maloloina, sosoo ma le aoaoina, sosoo ma le atinae o le atunuu.

Saunoa mai le sui usufono.

**Afioga SULAMANAIA FETAIAI TAUILILI TUIVASA:** Lau Afioga i le Fofoga Fetalai, o le sui usufono mo Vaimauga Sasae e tumu i le ava, leaga o lea ua faauilavea le Afioga i le Palemia e lei avatua faamaoniaga. O le faamaoniaga o lau tala lea e avatu, a silasila i alo ma fanau o le motu lea o Tutuila, e faapena ni tino, se I tulou, ona o le a? e ai atoa lava se i tulou le vaemoa. O le ala lea o le vaemoa lea e aumai o lea e aumai i Amerika. O la e i ai i totonu le faamanuiaga se i tulou o vailaau ia e.... o le ala lena o le malolosi ma le.... A o tatou e le mafai ona tausami atoa se vaemoa....

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai. O le ala lena o lea e faasalalau ai i le lalolagi, o le atunuu e pito i sili ona diabetes maualuga, o Amerika Samoa.

**FOFOGA FETALAI:** Faaiu maia le saunoaga i lea mataupu.

**Afioga SULAMANAIA FETAIAI TAUILILI TUIVASA:** Lau Afioga o le a see ese le sui usufono mo Vaimauga Sasae. O au e tumu i le ava ma le faaaloalo. Ua faauma atu ai foi so matou sao, e pau lava lena o le tulaga sa tatalo atu ai i le Minisita. Ou te le i faalavelave lava i ana siitaga i tulaga tapaa ma vaitaumafa ma uaina. A o lea foi ua toe oo le maemaea i taumafa a le atunuu. O ai? E toe tigaina lava o tatou tagata. Ae ui i lea, e tatalo atu i le vaemoa ona o le mataiai lea o lo o tua i ai si o tatou atunuu. Aua a toe tuu loa i ai le tiute ua le mafai ona toe maua i se \$40, o lona uiga o le vaiaso fou ua oo i luga, ua le gafatia e lo tatou atunuu.

Ae ui i lea, faauma so matou leo, leaga ua tautua upega lo matou manatu, o lo o i ai i totonu o le Tala Faatatau o le Tupe se vaega e aumai i lenei vaega.

O lenei itula lau Afioga i le Fofoga Fetalai, e le tuua foi i lalo le agaga foi o lenei itumalo o Vaimauga Sasae.

Ou te tulai lava ma lou agaga faaaloalo, ona o lo o faafofoga foi le atunuu i le faalavelave foi na tulai mai i lea itu o Atua, ua fesiligia ai le sui usufono mo Vaimauga Sasae. O fea o i ai oe lea Tuisamau o lea e tofofi oe e te alu atu e vaai le tuaoi o Atua, a o lenei e tupu mai faalavelave ma mea faapea. O lea la lau Afioga i le Fofoga Fetalai, o le a avea au e fai ma o ta sui, leaga e faigata lau fetalaiiga Pulemagafa, le fale Tuamasaga tapuai mai, ae se i fai foi so tatou sao, leaga ua fesiligia e le atunuu. O fea o i ai oe? O le mea lena na tofofi ai Tuisamau nei o Taua ma Fuatimau o Tama Matutua e leoa tuaoi o Atua, e leoa, i Mulivai o Tuafasa, ae o lea ua faalogologo le atunuu ma ua gugulu le atunuu, pe ua tuuaia ai Tuisamau i le leai o lona vaai o le itumalo ma le tuaoi. Ae lea e faafofoga Samoa, e leai se mea o gase, o lea lava e pisa lava latou i o latou eleele. E le o sopoiia mai i o tatou eleele sa.

**FOFOGA FETALAI:** Ia, ia... malie le sui usufono, lea ua tulai mai ia le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Faamolemole le sui usufono, se fautua ane ma Tuisamau, a oo ina toe faataga ia le tou aulakapi i le tausaga fou, ona fautua lea ia Tuisamau, se i vaai lelei amio a tama. Aua o le mea tonu lava lea na fai e le tama lea mai i le isi a outou afioaga o lo o e vaaia, lea na



tupu ai le misa lea na tupu nei. O mea lava ia o le amio le pulea i totonu o le taaloga lakapi, ia se i e alofa la, se i fautua ane Tuisamau e faufautua i tama, e taofiofi le mea lena.

**Afioga SULAMANAIA FETAIAI TAUILILI TUIVASA:** Lau Afioga i le Fofoga Fetalai, faafetai i le fautuaga lea ua faalogo lou itumalo...

**FOFOGA FETALAI:** Ia malo faafetai, ou te faamalulu atu i lau Afioga i le sui usufono mamalu Tuisamau, ia le sui usufono mamalu foi o Vaimauga Sasae e pei ona e taumafai mai, ia e i ai le manatu o le a tatou toe asa i tua, ia ma e pei e faapena se lagona, o lona uiga e toe tulai mai foi nisi o sui usufono, e faapena, aua e le na o lau Afioga, o faapena ona i ai sou finagalo e fia faaalua ia sou finagalo e tusa ai o le itu lea.

Ia o lea ua maea ona tapena ua saunoa foi le Taitai o le Malo, ia aemaise foi o le Matua, Fonotoe faapea foi le paia aua ia Lealaiasa na tulai mai e nanau e faaalua sona finagalo, o lea lava na usitaia se lagona, tuu aulafo lava ua lava le saunoaga i le Afioga i le Taitai o le Malo ia faapea foi le matua ia Fonotoe, fai lea mo tatou i le tulaga o le tapuai mai o Samoa.

Ou te faamalulu atu ai ma faamalie atu ai i lau Afioga, ia aua a e toe saunoa nei foi, ona tatou toe o foi lea i tua. Ae ona o le tatou galuega e fuafua lava i o tatou itula faigaluega, o le mea la lea, malo faafetai.

Ou te tapu le sui usufono o Nuu Tu Taulaga i Sisifo.

**Afioga FAUMUINA ASI PAULI WAYNE FONG:** Faafetai i lau Afioga i le Fofoga Fetalai, ia alaala foi le Afioga i le Tama o le atunuu ia po o le Afioga i le Palemia ia aemaise foi le mamalu o Afioga i Minisita.

A ua ou tulai atu e avatu se vaivaiga foi o lenei itumalo e uiga i le tatou Tulafono Tau Faaofi. O le mea muamua lava e le afaina lava le Tulafono, i ona vaega eseese, ona ua i ai lenei tausaga ua tele ia tatou lafoga ia ua siitia, e tele foi ia tatou lafoga ua uma ona faaopoopo, ia o le a le toe alu i ai se faamatalaga. Ae o le naunauga o lenei itumalo, ia aemaise foi lenei sui usufono, pei e manaia pe a aumai faatasi ma ni faamanuiaga. E le gata i le sii o lafoga, ae aumai ni faamanuiaga mai le Ofisa o Lafoga, pe aumai foi ni faamanuiaga mai le Malo, e fesoasoani ai i tagata faigaluega, o lo o latou totogia ia nei lafoga.

Lau Afioga i le Fofoga Fetalai, aua a sii sii, ia e silafia uma lava e le mamalu o le atunuu aemaise foi lena itu, e sii lava, ma faaoga atu ai tupe maua a i latou o lo o faigaluega. O le tatalo lea e tatalo atu ai, pe mafai e le Afioga i le Minisita, tatou toe o lava i le mea lea o le tax return a tagata faigaluega, ina ia mafai ona maua mai ai ia sina faasiliga, e le tele, sina faasiliga laitiiti, e fesoasoani ai i le toe totogiina o tax nei ma le siitaga o le lafoga lea ua i ai. Fesoasoani mai le NPF, e ala i ana pasene, taitasi i lea vaitaimi ma lea vaitaimi, e aumai faatasi ai e momoli mai ai, ina ia mafai ai ona fesoasoani i le afaigaluega o lo o taumafai. Fesoasoani mai le ACC, ua leva ona latou ao tupe i tagata faigaluega. Ia silafia lelei e lo tatou atunuu, e toatele lava i latou e laiti, e maua mai ai le faamanuiaga i le ACC, ae o le lautele o tatou, e leai se mea. O lea la e tatalo atu ai i lau Afioga i le Minisita, ia, aumai pea au lafoga o lea lava e lelei o lea e talia atu, aua o lo o i ai le faamanuiaga i tua atu. Ae faapaleni mai la i ni nai faamanuiaga mo tagata faigaluega lautele aemaise i tatou nei. Ia tilotilo le Faigamalo i se tulaga ua i ai se siitaga o totogi, pe a faapea ua i ai mo tagata faigaluega a le Malo, aemaise foi kamupani lautele, aua a faapea e fai uma mea

ia, lau Afioga ou te tautino atu, o le a lava le lafoga e te aumaia, tatou alu lava i luma aua o le polokalame ua uma ona faataatia e le Malo.

Ia o nai motugaafa na, a faapea e toe foi ai le Malo i mea ia, ia momoli tele atu le faafetai i lau Afioga ma lena itu. O lo o i ina le tofa, o lo o i ina foi le manuia o le tatou atunuu i mea uma lava tatou te faia. O se vaivaiga lea, ia manuia lava le tatou fonu i lenei aso, faafetai.

**FOFOGA FETALAI:** Malo, malo faafetai, ia se i tuu atu le avanoa i le sui usufono mo Falealili Sasae, masalo toe pau lea o le sui usufono.

**Afioga FUIMAONO TEO SAMUELU TEO (Falealili Sasae):** Lau Afioga i le Fofoga Fetalai e manatu e le umi se taimi e avatu ai ia ni motugaafa. Manatu o lea ua taoama lava paia o le Maota ma tulaga faalupe, ia aemaise foi o le afio o lau Afioga o le pao ma le vavao o le Maota nei.

E faatomua atu i se faamatalaga faapea e lagolagoina ia le Tulafono Tau Faaofi. E ui lava foi faapea ua aumai i le Tala o le Tupe se estimate figure, ia ae lea tatou te le o mautinoa pe alu i luga pe alu i lalo. Na pau lava le tatalo a lenei itumalo i lau Afioga i le Minisita e ona le Tulafono Tau Faaofi, e manatu a pasia nei le Tulafono, ou te le iloa po o a measures o lo o fai e le tatou Matagaluega aemaise o le Afioga i le Minisita, e mataitu ai oloa o lea ua i totonu o le atunuu. Afai nei ae sii le mea lea, o lona uiga o oloa sa sau i totonu i se tau mauualo, lea sa totogi, e otomeki lava le faatau loa e faleoloa ma wholesale i luga o se tau mauualuga. Ia ae po o a ia vaega foi lele, ina ia mataitu ai i pisinisi ma i latou o lea ua i ai oloa i totonu o le atunuu pe afai ae pasia le Tulafono Tau Faaofi lenei. O le atugaluga lena o le sui usufono o lenei itumalo.

O lona lua, e malie foi i le faalogologo atu i le saunoaga a le Afioga i le Minisita mo Tina ma Tamaitai, Nuu ma Agafesootai, sao lelei. A o le faanaunautaga o lenei itumalo maimau e, pe ana faapea o se mea o lea e galulue faatasi ina ia mafai, ona implement muamua ia le polokalame foi lele e faamalosi, o la ua i ai, ae le o malosi. Ina ia autilotilo foi ia le Minisita mo Faatoaga, autilotilo le Minisita mo Pisinisi ma Alamanuia, ia faapea ai foi ma le Minisita mo le Soifua Maloloina e galulue faatasi, autilotilo lea po o le a le auala lea o le a fai muamua, ae le i siia mea ia. Aua o le upu moni lava e le o sauni le atunuu, e talia le siitaga lenei aemaise lava le moa.

Masalo a tilotilo lau Afioga i le Minisita i tua i nuu i tua e i ai lo matou itumalo, ma Safata ma Lefaga, o le tele o faleoloa, a susue le aisa, tulou, na o le moa lava la e i ai i totonu. Aisea? Pau lava lea o le freezer la e taugofie. E seasea e vaai i ai ma e tagai i ai o i ai se mamoe, a o se pipi, e ui lava ina faatau nana e nisi, ae o le taimi lenei, o la ua tatala.

Ae o le atugaluga lena lau Afioga i le Minisita, ina ia mataitu vaega nei, aua o lona uiga, o le a matuai mafatia foi le atunuu i le tau o mea nei oloa ua i totonu o le atunuu, pe afai ae siitia le vaega lea. Ia o le lagolago lena i le Tulafono a le Afioga i le Minisita aua ou te iloa, pau lea o le Minisita e le moe lelei. Ia aua foi e tausaili le tupe e faatupe ai le Paketi a le Minisita mo Tupe Totogi, ina ia mafai ona atinae galuega.

O lona uiga, e le i aumaia lava se saunoaga a le Minisita o le Soifua Maloloina, aua a silasila lau Afioga i le siata lea e aumaia e le falemai, e tasi lea o taumafa, o lo o faatulagaina mai, e matuai sefe mo le soifua maloloina o le moa, e uma loa le ia, sosoo loa le moa. E pei o taumafa ia o la e faatulaga mai e le falemai, ae o la e nofonono lelei le Minisita o le Soifua Maloloina, e le o i ai sana

faamalamalama, pe sao mea ia e aumai, aua o lea e pei e foliga pei e malifa le soifua maloloina le aumaiga e le Minisita lea mo Tupe Maua, ae o la e ataata ma soisoi le Minisita o le Soifua Maloloina, o la na te iloa, o le soifua maloloina e maua i le moa.

Ia ma le faaloalo lava, faafetai mo lou avanoa.

**FOFOGA FETALAI:** Malo, masalo o le mea lea na taua e le sui usufono, masalo o le moa Samoa. E tuuaina ai lau Afioga i le Minisita mo le Soifua Maloloina, ia ae po o le sao lea leaga o lea ua e tulai mai o lea ua ou faamalamalama i ai i o.

**Afioga Hon Tuitama Talalelei Tuitama (Minisita mo le Soifua Maloloina):** Sao lelei lau Afioga, faafetai.

**FOFOGA FETALAI:** Malo, ia faafetai..

**Tofa AUMUA ISAIA LAMEKO (Falealili Sisifo):** Lau Afioga i le Fofoga Fetalai pe...

**FOFOGA FETALAI:** Ia, tulai mai le sui usufono mo Falealili Sisifo. Ia faamaea mai le lua pitolaau. Faamaea mai lua saunoaga ona tali loa lea o le Minisita.

**Tofa AUMUA ISAIA LAMEKO:** Faafetai i lau Afioga i le Fofoga Fetalai mo le avanoa, faafetai mo le avanoa i lenei taeao. Atonu o lea ua malamalama lelei i le autu o lenei Tulafono Tau Faaofi, ma e faamauiina ia le agaga o le faafetai i le Afioga i le Minisita ma le Matagaluega e tusa ai ma lenei Tulafono Tau Faaofi.

E lagolagoina e lou itumalo ia le vaega o le Tulafono se i vagana ai ia le vaega lea e pei ona taua le tulaga i le moa, e silasila i ai ia pe le mafai ona toe tuu tuu laitiiti i lalo ia le pasene lea e pei ona taua mai i i i le 10%.

Ae e fia fai sau faamatalaga i le tulaga lea e taua ai le mamafa o le pusa moa po o se pusa mamoe, aua e pei lava ona silafia, lea sa i ai le faiga faavae a le Malo lea sa suia ai le tatou pusa eleni mai le pusa lapoa i le pusa laitiiti. Ae pe le mafai ona fai ia se faiga faavae po o se Tulafono a le Malo, e faatulaga ai le mamafa o le pusa moa ia po o le pusa mamoe, po o le pusa siusiupipi.

E ala la ona fai lau faamatalaga lea, e fua foi i a tatou talo o lo o ave i Niu Sila ma Ausetalia, o lea o lo o faatulaga e fua i Tulafono a atunuu ia le auina atu o oloa ia, lea e pei ona i ai le taga talo i le taimi lenei, e 20kilo le mamafa. E fautuaina ai le Malo, e silasila i le tulaga lea, ina ia faaitiitia le tulaga o le mamafa o kilo o pusa moa... atonu foi e gafatia e tagata.

O le isi tulaga, ia atonu o lo o manino lava i le Tulafono lea e i lalo o Pisinisi ma Alamanuia ma Leipa, ia le tulaga foi lea o le aia tatau o le tagata faatau. E valu aia tatau e filifili ai le tagata pe faatau le oloa pe leai. Ia atonu o le tasi na vaega sa masani ona vaai i luga o le TV o faasalalau ai ia aia tatau ia, ia e tuualalo i le Afioga i le Minisita pe le mafai e le Matagaluega ona toe faasau le tatou ad lea e faatatau i aiatatau a tagata faatau, atonu o i i na e manino ai le toatele o tagata faatau i mea e tatau ona oo i ai.

Ia o le manatu lea lau Afioga i le Fofoga Fetalai, faafetai mo le avanoa.

**FOFOGA FETALAI:** Ia, tapa lau Afioga i le Minisita e ana le Tulafono Tau Faaofi e te saunoa. O le tele lava o mea ua uma ua maea ona faamalamalama, po o i ai se isi mea o totoe.

**Afioga Hon TIALAVEA FEA LENIU TIONISIO HUNT:** Faafetai i lau Afioga i le Fofoga Fetalai, talitonu ua tele ina malamalama ma ua uma ona faamalamalama le tele o lenei Tulafono Tau Faaofi. Ia o le agaga lava ia e taatia mai, taatia maia i i nei le fautuaga ma viiviiga ma faitioga ma fautuaga, i le Matagaluega ona ua vave foi ia le tatou taimi. Faafetai i lau Afioga.

**FOFOGA FETALAI:** Malo, faafetai.

*Na faamaonia le lafo ma faitauina le Tulafono Tau Faaofi o Teuteuga o le Tulafono o le Faasologa o Tiute 2018 i lona faitauga faalua.*

#### **TULAFONO TAU FAAOFI O TEUTEUGA O LE TULAFONO O LE FAASOLOGA O TIUTE 2018 – iloiloga auiliili**

**FOFOGA FETALAI:** E tusa ai ma Tulafono Tumau, e amata le iloiloga auiliili i le Fuaiupu 2.

**FUAIUPU 2: Teuteuga i le Faamatalaga Muamua.**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Teuteuga o le Tulafono o le Faasologa o Tiute 2018.**

*Faamaonia.*

*Na faagasolo le Tulafono Tau Faaofi o Teuteuga o le Tulafono o le Faasologa o Tiute 2018 e aunoa ma se Teuteuga.*

#### **TULAFONO TAU FAAOFI O TEUTEUGA O LE TULAFONO O LE FAASOLOGA O TIUTE 2018 – faitauga faatolu**

**Afioga Hon TIALAVEA FEA LENIU TIONISIO HUNT:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faasologa o Tiute 2018 i lona faitauga faatolu.*

*Faaluaina e le Minisita mo Tina ma Tamaitai, Nuu, Afioga ma Agafesootai ma le Minisita mo Faatoaga, Vaomatua ma Faigafaiva.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**TULAFONO TAU FAAOFI O TEUTEUGA O LE TULAFONO O FUA  
FAATATAU O LAFOGA O OLOA E GAOSIA I LE ATUNUU (NU.2)  
2018 – faitauga muamua**

**Afioga Hon TIALAVEA FEA LENIU TIONISIO HUNT:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu (Nu.2) 2018 i lona faitauga muamua.*

*Faaluaina e le Minisita o Tupe, Minisita mo Aoga, Taaloga ma Aganuu ma le Minisita mo Faatoaga ma Faigafaiva.*

*Na faamaonia le lafo ma faitauina le Tulafono Tau Faaofi lona faitauga muamua.*

**TULAFONO TAU FAAOFI O TEUTEUGA O LE TULAFONO O FUA  
FAATATAU O LAFOGA O OLOA E GAOSIA I LE ATUNUU (NU.2)  
2018 – faitauga faalua**

**FOFOGA FETALAI:** Talu ai ua taulimaina le Tusi Faamaonia o le Tulaga Faanatinati, o lea o le a sagai atu ai loa le Fono Aoao mo le faitauga faalua.

Tulai mai lau Afioga i le Minisita mo Tupe Maua.

**Afioga Hon TIALAVEA FEA LENIU TIONISIO HUNT:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu (Nu.2) 2018 i lona faitauga faalua, ma ou te fia tautala faamalamalama i ai.*

*Faaluaina e le Minisita o Tupe ma le Minisita mo Faatoaga ma Faigafaiva.*

**FOFOGA FETALAI:** Ou te tapa lau Afioga mo lau saunoaga faamalamalama.

**Afioga Hon TIALAVEA FEA LENIU TIONISIO HUNT:** Lau Afioga o le Tulafono Tau Faaofi lenei o le Tulafono o le Ava Malosi po o le spirit le o lo o gaosia i totonu o le atunuu. O le Tulafono Tau Faaofi lea na fuafua e aumai faatasi ma le isi Tulafono lea na tuu mai talu ai, ae ona o le tele o faalavelave tutupu mai i tua i alaalfaga i tua mai le Ofisa o Malu o le Malo o lo o taua mai ai pea i lea masina ma lea masina le tele o faalavelave tutupu ona o le ava malosi lea o lo o gaosia i totonu o le atunuu, lea la ua sui ai le Tulafono lenei, ua sii i luga le excise tax i le 100%. O le taimi lenei sa i ai sa \$19.56sene i le lita le excise tax sa i ai. O le taimi la lenei ua sii i le \$38.60 le excise tax ua i ai i le taimi lenei i fagu malolosi uma lava i le 40% le malosi. Ua faagata ai foi i ina le malolosi o fagu malolosi e aumai totonu o le atunuu. E 40 pasene le malosi e le mafai ona toe aumai se fagu e sili atu le malosi nai lo le 40% o le alcohol i totonu. A o le excise tax la lena ua i ai e \$38.60 i le lita, ma e le o mafai foi ona toe utuina i lalo ifo o le 500mililita pe afa lita se fagu i totonu o

le atunuu, e tatau ona gata i ina le lapopoa o fagu e aumai ona o le tele o fagu laiti ia sa masani ona ave e tamaiti i totonu o falepia, e nana i totonu o taga o latou ofu.

A o le agaga autu lava ia, o le tau faaititia o faalavelave tutupu mai i tua i le atunuu lautele. O le toatele foi o e o lo o o atu i uta i le toese e mafua mai lava faalavelave matuia ona o le ava malosi ae taua ai lava le vodka. E le o lotea le pia, a o le mea malosi, e amata i le 16% e tau i le 40% ua \$38.60 le excise tax.

E pei o le tala atu lea lau Afioga i le faamalamalamaga o le Tulafono Tau Faaofi, ona ua fai lava ona o le puipuiga maiga o le mamalu o le atunuu i le tele o faafitauli o lo o tulai mai pea i tua, ae maise foi o le taulaga lau Afioga.

**FOFOGA FETALAI:** Malo faafetai. Ia, ma o lenei foi Tulafono Tau Faaofi e faapena ona safea lava i saunoaga a sui usufono, aua pei lava foi ona silafia, o le tolu ai lea o Tulafono ua tagofia mai lenei vaiaso e fitoitonu i le Matagaluga a le Minisita e pei ona saunoa. Ona manatu lea, ua nofo fale ia Satuiamaa ae le gata foi i lea ua maea ona saunoa faamalamalama i le aso foi o le tatou faamalamalamaga. Ae masalo na pau lea o le sui usufono.

Se i tapa le sui usufono mo Faleata Sisifo mo lana saunoaga.

**Tofa LEALAILEPULE RIMONI AIAFI (Faleata Sisifo):** Faafetai lava. E le umi se manatu. Na pau lava lea o le mea, ona o lea e pei e faatatau tonu le Tulafono Tau Faaofi i mea ia e gaosia i totonu o le tatou atunuu. E pei o le a feteenai ai foi ma isi, le manulauti foi lea a le Malo i le taumafaiga o mea ia e atiae aua e maua ai galuega ma mea faapea. E moni lava o le tau... O au ia ou te le o... Ma le isi la mea, ia manatua o lea faatoa tau promote mai le tatou uisiki lea e fai iinei, lea e fai i le talo ma mea na... A o lau faalogologo i le Afioga i le Minisita mo le Soifua Maloloina sa ma talanoa i le Aso Faraile na tea nei, fai mai e ese le manaia. Ae 65% le alcohol volume lena e i ai. Ia, a o lea la e foliga mai o lea o le a tuu i lalo i le 40%. Ia manatua e eseese mea, e moni lava o le sipili ae i ai ma le cure ma mea faapena i le fuafua lea i le mea e faaoga ai ma le tagata... aua pe 40% pe 20%, e fuafua i le ituaiga taumafaina po o le ituaiga inu e te inua ai le fagu malosi. Pe te inu mataina pe sui, e tai pei lava o meaa lea na tatou pisa ai nei. E lelei uma lava mea, ae fuafua i le ituaiga kuka e te kukaina ai ona e le mai ai lea.

A o le isi vaega, po o le fofu lea o le faafitauli, aua e moni le Afioga i le Minisita, e tele tele fagu ia e gaosia i Vaitele i lalo ifo o au lea e gaosia ai isi fale vodka, ua ou vaai i ai i fale e fai ai. Ma se i siaki lelei mea la e gaosi ai ma fua lelei le contend o le alcohol la e i totonu o fagu nei, aua ou te talitonu o le matua tele o mea ia e le o sao ona fai. A o mea ia e tatau ona tilotilo i ai ina ia fetuutuunai ma vaai tatou mea fou lea ua taumafai le tatou Malo e fai o se mea lelei tele ne i te i ua afaina ai foi i le fuafuaga lea ua aumai. Ma le faaloalo lava.

**FOFOGA FETALAI:** Malo faafetai. Manaia le fautuaga, tautuana ma le Minisita le fautuaga. Tulai mai le sui usufono mo Gagaifomauga Nu.3.

**Susuga Hon LAAULI LEUATEA POLATAIVAO FOSSIE SCHMIDT:** Faafetai. Ou te masalo o le a faaiu e lenei itumalo saunoaga o lenei aso. O le fautuaga lava i lau Afioga i le Minisita ona o lea foi ua atagia le saunoaga ma le faamalamalamaga, ua ala ona sii le tiute o fagu malosi, ona o le tau puipuiga

o le saogalemu o le tatou atunuu. A o le fautuaga lau Afioga, e pei ua agai lava ina le feauauai ma le galulue faatasi foi le manulauti a tatou manufactures o oloa gaosi i le tatou atunuu ona o lea foi ua toe taotaomia i lalo le economy development o nai tagata ia e agai e fausia mea gaosi i totonu o le atunuu. It seems that we are killing the goose that lay the golden egg. Na ona avatu faapena pe faamata e tatau ona fai se formulation lelei e ogatusatusa ai le manulauti o le puipuiga ma le manulauti foi o le atinae i totonu o le tatou atunuu. Ma le mea lea, faamata e foia ai le faafitauli? Ia o lea ua faapito nei i le fagu malosi, ae faapefea le pia? O le ava lava o le ava. O lea foi tatou te vaai e le faapea na o fagu malosi o lea e tutupu ai faalavelave, e oo foi i pia ia e gaosi i le atunuu, o le mea lava e tasi.

Ia na ona tuu atu lava i ou tafatafa lau Afioga, o le manulauti a le Matagaluega, sue tupe aua development ma ia aua ne i aafia ai nisi foi o Matagaluega o lo o taumafai mai foi ina ia promote manufactures products for Samoa's export. Ia o le matou tuualalo lea ma le agaga faaaloalo.

**FOFOGA FETALAI:** Malo faafetai mo le fautuaga. Tulai mai le sui usufono mo Vaimauga Sasae.

**Afioga SULAMANAIA FETAIAI TAUILIILI TUIVASA:** Lau Afioga i le Fofoga Fetalai, e vave lava se manatu o lenei itumalo e lagolago atu ai foi i le mataupu al e Minisita o lo o sailia nei a tatou tupe. O lea ua tatou faalogo ua pasia le Tulafono foi o meaa, a o lea ua oo ifo i meainu. Faafetai.

Na pau lava se talosaga i lau Afioga i le Minisita pe le o aafia ai le Tulafono lea ua uma ona tatou sainia o le PACER Plus, ona o lea ua tatou sainia lea feagaiga ina ia auina mai i totonu ni oloa foi faapena i atunuu fafo ae alu atu tatou i fafo, a o lea e pei e foliga mai ua toe fai foi lenei Tulafono e taotaomia ai tagata o le tatou atunuu e fia atiae a latou pisinisi ia o le gaosiaina o le fagu malosi. O lea foi ua tatou vaai talu ona tulai mai le Minisita mo Faatoaga, o lea foi ua i ai lana uisiki. A faapea la e le o agai atu le tagata e ofoina lea auunaga e omai e faatino lea... E pei na pau lava sina vaega e tau popoe ai le sui usufono o lenei itumalo, ona o lea ua tatou ioe foi i lea feagaiga e auina mai ai i totonu oloa ae avatu tatou, a o lea o le a toe tuu i ai i luga ia ni lafoga foi i e o lo o gaosia ia auunaga foi i le atunuu.

Ma lou faaaloalo lava lau Afioga i le Fofoga Fetalai.

**FOFOGA FETALAI:** Malo. Ia se i tulai mai le Minisita.

**Afioga Hon TIALAVEA FEA LENIU TIONISIO HUNT:** Faafetai lau Afioga i le Fofoga Fetalai. E talitonu lava o le Tulafono Tau Faaofi lenei o le faaopoopoga i luga o le excise tax, e le o le tiute. A o lo o tumau lava le tiute i le mea o i ai. A o le lafoga foi lenei e lavea ai ma oloa ia e auina mai totonu o le atunuu, o le a siitia ai ma le excise tax o oloa ia, mea tau fagu malosi. E sao e le o lotea le pia. A outou tagai i le lipoti a le Ofisa o Leoleo na aumai i le Komiti o le Ava Malosi, e ova i le 60% o faalavelave o lo o tulai mai tua e lipotia mai lava o le taumafaina o le fagu malosi, e le o tau mai o le taumafataga o le pia, o le fagu malosi ia e avatu i tua.

O le tulafono foi i le puipuiga o le sao o le malosi, o lena ua matou okaina ia masini e aumai e fai si taugata, pe latalata i le \$200,000 e alu ai, afai o le fale lea sa i i, tau uma mai lava ituaiga minerale lea e i i ma le malosi o le fagu, po o se cocaine foi i totonu i i ua liuvai, e maua uma lava e le masini lea. E

taugata a o lea e taumafai e aumai e tau fofa ai le faafitauli lea, ma e le tataua ona toe gaosia se fagu malosi i totonu o le atunuu e ova atu i le 40%.

Lau Afioga i le Minisita mo Faatoaga, e solitulafono lau fagu malosi i le aso lenei pe a pasia le Tulafono. Ia manuia le Fono.

**FOFOGA FETALAI:** Malo faafetai.

*Na faamaonia le lafo ma faitauina le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu (Nu.2) 2018 i lona faitauga faalua.*

**TULAFONO TAU FAAOFI O TEUTEUGA O LE TULAFONO O FUA  
FAATATAU O LAFOGA O OLOA E GAOSIA I LE ATUNUU (NU.2)  
2018 - iloiloga auiliili**

**FOFOGA FETALAI:** E tusa ai ma le Tulafono Tumau, e amata le Iloiloga Auiliili i le Fuaiupu 2.

**FUAIUPU 2: Teuteuga i le Faamatalaga Muamua.**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Teuteuga o le Tulafono o Fua Faatatau o Lafoga o Oloa e  
Gaosia i le Atunuu (Nu.2) 2018.**

*Faamaonia.*

*Na faagasolo le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu (Nu.2) 2018 e aunoa ma se Teuteuga.*

**TULAFONO TAU FAAOFI O TEUTEUGA O LE TULAFONO O FUA  
FAATATAU O LAFOGA O OLOA E GAOSIA I LE ATUNUU (NU.2)  
2018 - faitauga faatolu**

**Afioga Hon TIALAVEA FEA LENIU TIONISIO HUNT:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu (Nu.2) 2018 i lona faitauga faatolu.*

*Faaluaina e le Minisita mo Tina ma Tamaitai, Atinae o Nuu ma Afioga ma Agafesootai, Minisita mo Faatoaga ma Faigafaiva, Minisita o Tupe ma le Minisita mo Aoga, Taaloga ma Aganuu.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofa Faitulafono.*



## TOLOPOINA

**FOFOGA FETALAI:** Ia, avea ia lenei avanoa e momoli atu ai le agaga faamalo ma le agaga faafetai i le paia o le Palemene i le tatou Fonotoa ma le Fonousu i le afio o lau Afioga i le Palemia, Sui Palemia, Minisita o le Kapeneta, Minisita Lagolago, aemaise foi o Taitaifono ma Komiti eseese a le Palemene ma Afioga i sui usufono mamalu. Malo le onosai, malo foi le faapalepale, malo foi le faatoatoa. E leai lava se faiva e leai sona taunuuga i lenei aso. O lea ua tatou toai taunuu i le siui ona o le agalelei o le Atua.

E momoli foi le faamalo ma le faafetai i le paia o Faauluuluga o Matagaluega ma Faalapotopotoga a le Malo o lo o faapena ona tui mai pea le mulipapaga ma tuutuu mai lo latou tauau e tapuaia o tatou faiva aua le faatinoga o le latou auaunaga e ala i le tatou galuega. E le faigofie, e faapea foi i le Failautusi Autu ma le Failautusi Lagolago o le Fono, aemaise foi o le mamalu o le Matagaluega o Leoleo i le latou galuega faifaipea o le tausiga o le mamalu ma le puipuiga o le filemu, aemaise foi o le Agai o le Maota i le susuga i le Salelesi ma le Satini. Malo le galulue. O le fetalaiga lava e fai i Atua, ua se togi le seuga lagatila ua faapulou i le tualima, ua faamalo fai o le faiva.

E faamalulu atu foi pe a i ai se upu ua faapena ona faapaia mata i le finagalo o le Palemene i le maitau i se aga a le Nofoa ua le tau, e i ai le manatu ia tatou maua le agaga o le fefaamagaloi. O le agaga autu lava ia tatou vave oo i le taunuuga o le tatou galuega ae malu le Nofoa i la outou faamalumalu.

O le mea la lea, ae tatou te le i tolopo, o le a ou faaiuina le tatou Fonotaga i se tatalo.

*Na tolopo Taulumaga a le Fono Aoa o le itula e 11:59 i le taeao seia aulia le itula e 9:00 i le taeao o le Aso Gafua, 26 Mati 2018.*